

De Bibel

In dat Jahr 2003 was dat Jahr van de Bibel. Sogaar in "Bild", dat grootste Bladd in Dütsland, stunn elke Dag ´n lüttje Artikel mit de Overschrift: "Meine Lieblings**Bibel**stelle". Dor seggt een Minske, weffe Stee hum in de Bibel un worum de hum an besten gefallt. Ok in uns lüttje Bladd, de EZ, kann man elke Week sükse Geschichten lesen. Ik finn dat immer heel interessant, wo anner Lü bekannte Bibelsteden, de de meisten Christen kennen, ut hör Sicht sehn.

In de Paulus-Gemeen in uns Stadt is van jung Lü, all wat in de Bibel steiht – Woord för Woord – vörlesen worden. Dat hett ´n paar Daag dürt un is heel goed ankommen.

Dat de Bibel in disse Förm overhoopt schreven worden is, is ja ´n Wunner. Se is na un na, Stück för Stück, in Loop van Jahrhunnerten entstahn. Dor schrifft een Mann ´n Deel in Arabien, een anner ´n Deel in Syrien of in Palästina, un ´n anner weer in Grekenland un in Italien. Eenige Schrievers brengen hunnerte van Jahren vör of na de annern wat toe Papier. Un de eerst Deel wurr al völ hunnert Jahr, bevör de Schriever van de lesd Deel geboren wurr, schreven.

Ja, dat is al ´n Wunner, up weffe Aard un Wies de Bibel na un na wurs, un dat is immer noch ´n Geheem in uns Tied. Man weet vandaag, dat Ruugweg 1.500 Jahr an de Bibel schreven worden is. Dat sünd 60 Generationen!

As Moses overleden was, gaff dat eerst ´n heel paar Texte van de Bibel. As David up Thron satt, gaff dat al mehr. Een na de anner, of Fürst, Preester of Prophet, hemmen mit hör Geschichten dortoe bidragen, dat dat olle Testament klaar worden is.

Man dat Neei Testament is ok wat Wunnerbaares. Fievtig Jahr nadem Jesus geboren wurr, was noch keen eenzige Rieg van dat Neei Testament schreven. Un de Apostels hemmen sük ok neet ofstimmt, well wat un worover een schrieven sullte. Nee, Markus, Lukas, Johannes un ´n Bült anner Lü schreven dat up, wat för hör dat Wichtigtes in Jesus Leben west is.

Un noch wat: Wi proten immer van de Bibel as een Boek. Dorbi sullten wi aber weten, dat de Bibel in Würrkelkheit ´n lüttje Bibliothek is, de ut 66 verskeden Schrifften besteiht, de van 30 bit 40 verskeden Schrievers in dree verskeden Spraaken schreven worden is.

Un noch wat Besünners an de Bibel is, dat disse Boek in bold in all Spraaken van de Welt druckt un ok lesen word. Keen Minske of Regeren hett dat in d` Loop van de Jahrhunnerten schafft, dit Boek toe verbeden. Ofwall dat faak versöcht worden is. Besünners de römische Kaiser Diokletian hett in `t Jahr 303 versöcht, all Bibels för immer ut de Welt toe skaffen. Man sogaar de römische Kark meente in d` Middeloller, dat de Bibel nix för dat eenfache Volk was. Minsken, de de Bibel domaals trotzdem leesden un man hör dorbi snappen dee, wurren dör van de Papst insette Inquisitoren foltert un dorna meistens up ´n "Scheiterhaufen" verbrandt.

Sullten wi neet dankbaar wesen, dat wi de Bibel vandaag ohn Gefahr för Liev un Leven alltied un overall lesen können? Man, fraag ik mi, worum komen wi so selten dortoe?

Ik weet neet, well dat klaar brocht hett, dat Jahr **2003 as dat Jahr van de Bibel** toe maken, man disse Minske is toe danken. Dat sullte man faaker maken! Intüsken sünd al weer dree Jahr vergahn.

So können Millionen van Minsken Dag för Dag up dat henwesen worden, wat in de Bibel steiht. Un is dat in disse Tied neet wunnerbaar?